

PILIMON

Pilimon tayekelesiy teitan, tage natouwat yagan Onesim bo isawl. Mtowen gog Onesim isawl in, mo Pawl iban, ikatimlakay sinapun Yeisuw Kelis. Mtowen Onesim itam Yeisuw nakaleiwag waseg, mo iyekelesiy. Mapuna Pawl ilel Pilimon nalet vagan Onesim bikow, beiyum binek natovek, bisek Pilimon nalet, bivin, mo beilub nuwan. Mata ge bikavikun.

Nakabsilamaw

¹ Yey Pawl, wadeil ases peinan Yeisuw Kelis angamag yey. Soug bwadag Timotiy nakases. Gunalet neiw, kukin. Kalin nuwem yakoum Pilimon, peinan dawotets katanok-wan.

² Kalin nuwem-vak numet Apiy, son Alikip. Taw towen soug yey nakatawtoun Yeisuw nawotet silmanin.

Kalin nuwem tayekelesiys babaw simwey kutitapwalouls wambunatum.

³ Tamads Yowbad son daGuyaws Yeisuw Kelis bisiwyoubumiy, mo beitaw nuwamiy.

Pilimon ansinap bwein

⁴⁻⁵ Tut babaw aninuweim-wan, annitoug vagan Yowbad bilabeim. Ikalin nuwag waseg Yowbad, peinan naligen bulagan musiwayoub waseg daGuyaws Yeisuw, o wasigeis natayekelesiys babaw, sona mutoukum pines tasiyas sisiy daGuyaws Yeisuw.

⁶ Anitoug pines simwey, v^ugan kid bitakayasis amsinap bwein, mo bikakins Yeisuw nasiw^uyoub avakaein wasigeis yakids.

⁷ Yeisuw angamag amnes singaya ibwein, peinan yak^uoum bo nukusiwyoubus tasiyas; ma-puna yey ikalin nuwag, amwasaw peinan aligen bulagan musiwayoub wasigeis tayekelesiys.

Pawl initoug v^ugan Pilimon beitam waseg Onesim

⁸⁻⁹ Peinan musiwayoub avakaein, kweitan youd anitoug waseg yak. Kelis waseg bweina bakabtak^ueim, tage nag bayakeikay waseg yak; bayowal-wan. Yey Pawl tamwey yey, nases w^udeil Yeisuw Kelis peinan.

¹⁰ Ayowal waseg yak silmanin natug Onesim. Yey ases w^udeil bo avkek natug mtowen, peinan bo isimounid daGuyaws waseg.

¹¹ Kweiboug nag ilabeim bwein; tut gog towen singaya bilabeid bwein.

¹² Bo akayeb mtowen neiyum niwekeim, ikalin nuwag seikwan.

¹³ Sivinag kid bakayus natug towen, atimapum yak^uoum, peinan ililabeig w^udeil nases. O yey nases w^udeil peinan takawein livanen Yeisuw yey.

¹⁴ Nag gog, awoum basilponay o bakayus gamag towen; awoum. Adok beivag sivinam mutouwat towen; awoum basimkineim v^ugan sinap to bwein bukuvag; tage tatoneim-wan bukutam, bo bwein.

¹⁵ Adok tut kadiyakus waseg niyamkwaneim mutouwat townen, vāgan beiyum biwekeim mo bisesun bisigeg mugwamag bwanabwein townen.

¹⁶ E, mutouwat townen bo imlavag bwadam, peinan isimounid Yeisuw waseg. Yey-vak apwakit waseg taw townen; tage yakoum-vak kadiloka bukwakit peinan bwadam tatoneim. Bo iyekelesiy, mo imlavag bwadam-vak daGuyaws waseg.

¹⁷ Kukin bweina bawekeim ambwabwal yey, kadiloka kutam waseg mtowen, peinan māwana yey.

¹⁸⁻¹⁹ Kukin aveiyag nises niyageg nanoum waseg, igaw yey mo bamop. O kukin aveiyag nibakew waseg yak, igaw yey mo bamop-vak.

Yey Pawl wanamag nalel, “Igaw bamop mo bikadilok.”

Adok awoum batālay waseg yak, kululuwam silmanin, peinan kweiboug nakatimlakeim Kelis wayagan mo nukuyekelesiy.

²⁰ E, veiyoug yak, bweina bukwānow aygag, bukusiwyoub mtowen Onesim, daGuyaws Kelis yagan waseg, mo beitout nanoug.

²¹ Mulet townen nalel neiw. Akakin-wan bo bukwānow aygag, tage mo bukwatimweis musiwayoub bivakaein.

²² Youd kweitan-vak balivan waseg yak. Mukwanitoug waseg Yowbad, adok mo bilikugs, baw; sivinag ābag kwatineg wambunatum peinag yey.

²³ Epapil soug yey nakases wādeil, Yeisuw Kelis nawotet peinan; mtowen ikalin nuwan waseg yakoum. Anilivan māwan.

²⁴ Mawan-vak tasiyas sigwey nakawwotet,
Mak, Alistak, Dimas, Luk.

²⁵ DaGuyaws Yeisuw Kelis bisiwyoub kulu-
luwam yakoum.
Yey Pawl.

KALEIWAG KWEIVAW
The New Testament in the Muyuw Language of Papua
New Guinea
Nupela Testamen long tokples Muyuw long Niugini

Copyright © 1976, 1993 The Bible Society of Papua New Guinea

Language: Muyuw

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 11 Nov 2022 from source files dated 9 Oct 2020

517ae3da-6769-54e8-8afd-7d53f958558c